

摘藻堂四庫全書薈要

集部

欽定四庫全書薈要

集部

施註蘇詩卷十七

詳校官助教臣常循



欽定四庫全書薈要卷一萬四千九百六十八

集部

施註蘇詩卷十七

宋蘇軾撰

宋施元之註

武進邵長蘅刪補

詩四十一首

起元豐二年己未守吳興即以是年八月攝赴臺獄十二月謫官黃州洎

庚申春自京師赴黃作

李公擇過高郵見施大夫與孫莘老賞花詩憶  
與僕去歲會於彭門折花餽筍故事作詩二十



四韻見戲依韻奉答亦以戲公擇云

汝陽真天人絹帽著紅槿纏頭三百萬不買一笑哂共  
誇青山峰曲盡花不隕當時謫仙人逸韻謝封畛詩成  
天一笑萬象解寒窘驚開小桃杏不待雷發軫餘波尚  
涓滴乞與居易鎮爾來誰復見前輩風流盡寂寞兩詩  
人殘紅對櫻筍饑腸得一醉妙語傳不泯君來恨不與  
去更復相牽引我老心已灰空煩扇餘燼天游照六鑿  
虛室掃充牣懸知色竟空那復嗜烏吻蕭然一方丈居

士老龐蘊散花從滿祴不答天女問故人猶故目怨句  
寫餘懷疑我此心在遮防費欄楯應虞已斃蛇折尾時  
一蠢爪聞孟光賢未學處仲忍公自注開閤放  
出事見本傳寄招應  
已足左右侍雲鬢何時花月夜羊酒謝不敏此生如幻  
耳戲語君勿愠應同亡是公一對子虛所

杜子美八哀詩汝陽讓帝子眉宇真天人又詩每蒙天  
一笑復似物皆春南京羯鼓錄汝陽王璿立宗鍾愛之  
每游幸頃刻不捨璿嘗戴研絹帽打曲上自摘紅槿花  
一朶置帽上簷處二物皆滑久之方安遂奏舞山香一  
曲花不墜落上大笑賜璿金器宋開府與立宗論鼓事  
上曰頭如青山峰手如白雨點即羯鼓之能事山峰取

不動雨點取碎急互見七卷有美堂暴雨詩註楊妃外  
傳上羯鼓罷戲秦國請纏頭對曰豈有大唐天子姨無  
錢用耶遂出三百萬為一局上與妃子在沉香亭命樂  
工李龜年持金花牋召李白進清平調詞白承詔旨猶  
苦宿醒因援筆賦之上命龜年以歌妃笑領歌意尚書  
禹貢餘波入於流沙左傳僖二十三年晉公子重耳曰  
其波及晉國者君之餘也唐白居易傳初與元稹疇詠  
故號元白南史張融卒其從弟弔之曰阿兄風流頓盡  
王注兩詩人指韋老施大夫也唐宰相有櫻筍厨三月  
為最盛左傳襄十三年鄭石冀曰使歸而廢其使怨其  
君以疾其大夫而相牽引也不猶愈乎莊子庾桑楚身  
若槁木之枝心若死灰若是者禍亦不至福亦不來左  
傳成二年齊賓媚人請收合餘燼背城借一六鑿出莊  
子外物篇注已見史記蘇秦傳饑而不食烏喙者  
為其愈充腹而與餓死同患也宋齊丘化書躑躅之酒  
烏喙之脯初噉之若芥再噉之若黍復啖之若丸又啖

之若脯淮南子聖人處環堵之室高誘註曰堵長一丈  
高一丈面環一堵為方丈傳燈錄居士龐蘊少悟塵勞  
志求真諦散花天女出維摩經詳見十三卷坐上賦戴  
花詩注杜子美義鵲行白蛇登其巢吞噬恣朝食又折  
尾時一掉餓腸皆已穿晉王敦傳字處仲王愷置酒敦  
與王導俱在生有女妓吹笛小失聲韻愷便毆殺一坐  
改容敦神色自若又愷使美人行酒客飲不盡輒殺之  
酒至敦故不肯持美人悲懼失色而敦傲然不顧導遂  
歎曰處仲若當世心懷剛忍非令終也又嘗荒恣於色  
體為之弊左右諫之曰此甚易耳乃開後閤驅婢妾數  
十人放之毛詩鬢髮如雲古樂府有春江花月夜篇漢  
司馬相如傳亡是公亡是人也又亡是公所然而笑

### 王翬清虛堂

清虛堂裏王居士閉眼觀身心

一作

如止水水中照見萬

象空敢問堂中誰隱几吳興太守老且病堆案滿前長  
渴睡願君勿笑反自觀夢幻去來殊未已長疑安石恐  
不免未信犀首終無事勿將一念住清虛居士與我蓋  
同耳

楞嚴經月光童子白佛言有佛出世名為水天教諸菩  
薩修習水觀我於是時室中安禪我有弟子闍牕觀室  
惟見清水遍在室中莊子齊物論南郭子綦隱几而生  
再見晉謝安傳安石妻劉惔妹也見家門富貴而安獨  
靜退乃曰丈夫不如此也安石掩鼻曰恐不免耳史  
記陳軫傳謂犀首曰公何好飲也犀首曰無事也

和孫同年卞山龍洞禱晴



吳興連月雨釜甑生魚蛙往問卞山龍曷不安厥家梯  
空尚巉絕俯視驚谿研神井湧雲蓋陰崖垂鮮花交流  
百道泉赴谷走羣蛇不知落何處隱隱如縑車我來叩  
石戶飛鼠翻白鴉寄語洞中龍睡味豈不嘉雨師少弭  
節雷師亦停撾積水得反壑稻苗出泥沙農夫免菜色  
龍亦飽豚獾看君擁黃紬高臥放晚衙

戰國策知伯攻趙城水不沒者三版曰竈生龜人馬相  
食晉成公綏陰霖賦沈竈生蛙中庭運舟釜魚用范丹  
事已見李白詩仙鼠如白鴉仙經蝙蝠一名仙鼠千歲  
之後體白如雪棲則倒懸彌衡傳注撾擊鼓杖也禮記

歲十二月土反其宅水歸其壑白樂天詩暖閣謀宵宴  
寒庭放晚衙倦游錄文潞公初知榆次縣題詩於新衙  
鼓上云置向燕樓一任撾撾多撾少不知  
他如今幸有黃紬被努出頭來道放衙

乘舟過賈收水閣收不在見其子三首

賈收字  
耘老吳

興人

愛酒陶元亮能詩張志和青山來水檻白雨滿漁蓑淚  
垢添丁面貧低舉案蛾不知何所樂竟夕獨酣歌

五柳先生傳性嗜酒而家貧不能恒得親舊知其如此  
或置酒招之造飲輒盡期在必醉唐書張志和金華人  
適居江湖自稱煙波釣徒亦號玄真子顏真卿刺湖為  
更易敝舟浮家汎宅往來苕霅間嘗撰漁歌漁父山水

酒酣紙筆輒成憲宗命圖其像求之不能致盧仝詩莫  
怪添丁郎淚下作面垢添丁兒名也白樂天效陶詩客  
去有餘趣竟夕獨酣歌

嫋嫋風蒲亂猗猗水荇長小舟浮鴨綠大杓瀉鵝黃得  
意詩酒社終身魚稻鄉樂哉無一事何處不清涼

楚詞嫋嫋兮秋風詩國風瞻彼淇澳綠竹猗猗杜子美  
詩水荇牽風翠帶長唐東夷傳高麗馬訾水出白山色  
若鴨頭號鴨綠水大杓暗用晉人事鵝黃用杜詩竝已見

曳杖青苔岸繫船枯柳根德公方上塚季路獨留言已  
占蒲魚港更開松菊園從茲來往數兒女自磨門

襄陽記司馬德操詣龐公值其渡沔上先人墓注再見  
陶潛歸去來辭三徑就荒松菊猶存杜詩曬藥能無婦  
磨門幸有兒晉書李密  
傳磨門無三尺之童

次韻孫祕丞見贈

感慨清哀似變風老於詩句耳偏聰迂疎自笑成何事  
冷淡誰能用許功不怕飛蚊如立豹肯隨白鳥過垂虹  
吟哦相對忘三伏擬泛冰谿入雪宮

公自注湖州多蚊  
蚋豹腳尤毒垂虹

吳江  
亭名

冷淡用白樂天冷淡生活語詳見十卷游廬山次韻夏  
小正白鳥蚊蚋也金樓子白鳥蚊也齊桓公臥栢寢謂

仲父曰一物失所寡人悵悵今白鳥營營是必饑耳因  
開翠紗厨進之歷忌釋伏者何也金氣伏藏之日也金  
畏於火故至庚日必伏陰陽書後夏至後第三庚為初  
伏四庚為中伏立秋後初庚為終伏故謂之三伏王注  
世謂湖州為水精宮言其四面皆水雪宮借用孟子字

### 與客游道場何山得鳥字

清谿到山盡飛路盤空小紅亭與白塔隱見喬木杪中  
休得小菴孤絕寄雲表洞庭在北戶雲水天渺渺菴僧  
俗緣盡淨業洗未了十年畫鵲竹益以詩自繞高堂儼  
像設禪室各深窈奔泉何處來華屋過谿沿何山隔幽

谷去路清且悄長松度翠蔓絕壁挂啼鳥我友自杭來  
尚歎所歷少歸途風雨作一洗紅日燎俄驚萬竅號黑  
霧卷蓬蓼舟人紛變色坐羨輕鷗矯我獨喚酒杯醉死  
勝流殍書生例強很造物空煩擾更將掀舞勢把燭畫  
風篠美人為破顏正似腰支嫋明朝更陳迹清景墮空  
杳作詩記餘歡萬古一昏曉

吳興統記郡有五亭曰白蘋亭集芳亭山光亭朝發亭  
碧波亭又有白塔巷有白石塔在焉因名楚辭招魂像  
設居室靜閒安些括地志何山本名金蓋山晉何楷居  
此習業後為吳興太守改為何山唐傳奕傳自為墓志

云青山白雲  
人也以醉死

僕去杭五年吳中仍歲大饑疫故人往往逝去  
聞湖上僧舍不復往日繁麗獨淨慈本長老學  
者益盛作詩寄之

來往三吳一夢閒故人半作冢纍然獨依舊社傳真法  
要與遺民度厄年趙叟近聞還印綬竺翁先已反林泉  
何時策杖相隨去任性逍遙不學禪

朱長文吳郡圖經續記漢永建四年分會稽為吳郡以  
溯江中流為界晉宋齊梁陳之間雖頗割地而不改與

吳興丹陽號為三吳神仙傳丁令威云何不學仙家  
累左傳閔二年衛之遺民男女七百有三十人漢王莽  
傳莽下書曰予遭陽九之厄百六之會國用不足民人  
騷動今厄會已度趙叟謂趙清獻公忤前一歲以宮師  
致仕竺翁指  
淨慈本長老

舶趁風 并引

吳中梅雨既過颯然清風彌旬歲歲如此湖人謂  
之舶趁風是時海舶初回云此風自海上與舶俱  
至云爾

三旬已過黃梅雨萬里初來舶趁風幾處縈回度山曲



一時清駛滿江東，驚飄款款先秋葉。  
喚醒昏昏嗜睡翁，欲作蘭臺快哉賦，卻嫌分別問雌雄。

宋玉風賦：楚襄王遊於蘭臺之宮，有風颯然而至，乃披襟當之，曰：「快哉此風！」寡人所與庶人共者耶？」玉對曰：「此獨大王之風耳。庶人安得而共之？」曰：「豈有說乎？」玉曰：「發明耳目，寧體便人。」此大王之雄風。啗齧噉噉，獲死生不卒。此庶人之雌風。

丁公默送蝻蚌

溪邊石蟹小如錢，喜見輪囷赤玉盤。  
半殼含黃宜點酒，兩螯斫雪勸加餐。  
蠻珍海錯聞名久，怪雨腥風入坐寒。

堪笑吳興饒太守一詩換得兩尖團

胡越風物志蝤蛸并蟹十足生海邊泥穴中潮退採取之四時常有雌者帶大而肥重者踰數斤去殼渾煮熟分擘薦酒切為羹其小而黃者謂之石蝤蛸肉硬席於檢切酉陽雜俎蝤蛸大者長尺餘兩螯最強鄆縣昔有人於水際泥穴採取之為蟹所翦夾有頃而死至今呼此為蝤蛸洲

送孫著作赴考城兼寄錢醇老李邦直二君於  
孫處有書見及

使君間如雲欲出誰肯伴清風獨無事一嘯亦可喚來  
從白蘋洲吹我明月觀門前遠行客青衫流白汗問子

何怱怱王事不可緩故人錢與李清廟兩圭瓚蔚為萬  
乘器尚記溝中斷子亦東南珍價重不可算別情何以  
慰酒盡對空案惟持一榻涼勸子巾少岸此風那復有  
塵土飛灰炭欲寄二大夫發發不可絆

後漢方術傳趙炳嘗臨水求度船人不和之炳乃張蓋  
坐其中長嘯呼風亂流而濟注和猶許也俗本作知者  
誤李方直白蘋亭記洲在郡城南東亂雲溪據洲之陽  
揭大亭一焉一曰梁柳惲為吳興太守賦詩於此因以  
名洲清廟詩頌篇名尚書平王錫晉文侯桓圭瓚孔  
氏云以圭為杓柄謂之圭瓚漢鄒陽傳蟠木根柢輪囷  
離奇而為萬乘器者以左右先為之容也莊子天地篇  
百年之木破為犧樽青黃而文之其斷在溝中此犧樽

於溝中之斷則美惡有間矣其於失性一也詩小雅南山烈烈飄風發發

泛舟城南會者五人分韻賦詩得人皆苦炎字

四首

城中樓閣似魚鱗不見清風起白蘋試選苕谿最深處  
仍呼我輩不羈人窺船野鶴何曾下見燭飛蟲空自馴  
遠郭荷花一千頃誰知六月下塘春

劉禹錫湖州詩酒對青山月琴韻白蘋風孟東野送陸  
暢歸湖州詩渺渺雲谿前白蘋多清風韓退之送惠師  
詩惠師浮屠者乃是不羈人白樂天餘杭詩遠郭荷花  
三十里按今震澤以南派太湖之水亂苕霅二谿以通

舟楫東盡吳興西  
盡餘杭名曰下塘

苦熱誠知處處皆何當危坐學心齋  
海螯要共詩人把  
谿月行遭霧雨霾鄉國飄零斷書信  
弟兄流落隔江淮  
便應築室苔谿上荷葉遮門水浸堦

管子弟子職篇危坐鄉師顏色毋怍  
後漢茅容避雨樹下危坐愈恭莊子人問世顏回曰敢問心齋仲尼曰唯  
道集虛虛者心齋也把螯用畢卓左手持蟹螯語註已見

紫螯鱸魚賤如土得錢相付何曾數  
碧筒時作象鼻彎  
白酒微帶荷心苦運肘風生看斫鱠  
隨刀雪落驚飛縷

不將醉語作新詩飽食應慙腹如鼓

後漢諺河間詬女工數錢西陽雜俎魏正始中鄭公愷  
守濟南夏日率僚佐避暑於歷城之北使君林下以大  
荷葉酌酒以簪刺其心令與柄通莖上輪囷如象鼻傳  
飲之名碧簫杯歷下學之言酒味雅蓮氣香冷勝於冰  
竇子野酒譜亦云白樂天詩味苦蓮心小漿沽蔗節稠  
杜子美設醴歌無聲細下飛碎雪又詩刀鳴鱸縷飛張  
景陽七命乃命支離飛霜錫紅肌綺散素膚雪落酉陽  
雜俎南孝廉者善斫鱸穀薄絲縷因會客忽雷震鱸悉  
化為蝴蝶飛去

橋上游人夜未厭共依水檻立風簷樓中煮酒初嘗炙  
月夜新妝半出簾南郭清游繼顏謝北牕歸臥等羲炎

人間寒熱無窮事自笑疎頑不受疔

顧況湖州刺史聽記在晉則謝安謝萬王羲之獻之國朝則顏魯公左傳昭二十年齊侯疥遂疔杜預曰疔瘡也後漢景丹傳壯士不病瘡

贈王郎一首

一作與王郎夜飲井水此詩墨蹟刻石成都帖而集中失載王郎乃

子由壻子立也是時從先生於吳興

吳興六月水泉溫千頃菰蒲聚鬪蚊此井獨能深一丈

□□

一作源龍

如我亦知君

次韻李公擇梅花

詩人固長貧日午饑未動偶然得一飽萬象因嘲弄尋  
花不論命愛雪長忍凍天公非不憐聽飽即喧闐君為  
三郡守所至滿賓從江湖常在眼詩酒事豪縱奉使今  
折磨清比於陵仲永懷茶山下攜妓修春貢更憶檻泉  
亭插花雲髻重蕭然臥瀟麓愁聽春禽哢忽見早梅花  
不飲但孤諷詩成獨寄我字字愈頭痛嗟君本侍臣筆  
橐從上雍脫鞞吟芍藥給札賦雲夢何人慰流落嘉鵲  
天為種杯傾笛中吟帽拂果下鞚感時念羈旅此意吾



儕共故山亦何有桐花集么鳳君亦憶匡廬歸掃藏書  
洞何當種此花各抱漢陰壘

韓退之嘲少年詩直把春償酒都將命乞花孟東野詩  
文士莫辭酒詩人命屬花高士傳陳仲字子終適楚居  
於陵列女傳楚王欲以子終為相入告於妻妻曰亂世  
多害於是相與逃而為人灌園張君房脞說湖州長城  
縣啄木嶺金沙泉每歲造茶之所也泉處沙中居常無  
水湖常二郡守至於境會亭具犧牲拜敕祭泉其夕清  
溢及造茶畢水即微減供堂者畢水已半之太守造畢  
即涸矣守或還旆稽晚則有風雷之變云爾雅榘泉正  
出正出者湧出也三國志魏太祖先苦頭風臥讀陳琳  
所作檄翕然而起曰此愈我病數加厚賜見王粲傳注  
漢趙克國傳張安世本持橐簪筆事孝武帝數十年注  
橐契橐也近臣負橐簪筆從備顧問或有所紀也漢司

馬遷傳報任安書云迫季冬僕又薄從上上雍楊妃外傳  
開元中植木芍藥於沉香亭前會花繁開召李白立進  
清平調詞上自是顧李翰林異於他學士會高力士以  
脫鞵為耻摘其詞以激楊妃帝欲官白妃輒沮止漢司  
馬相如傳請為天子游獵之賦上令尚書給筆札賦云  
楚有七澤嘗見其一未覩其餘也臣之所見蓋特其小  
小者爾名曰雲夢雲夢者方九百里杜荀鶴梅花詩謝  
公吟賞愁飄落可得更拈長笛吹撫遺蜀州紅梅閣東  
壁有詩憑仗高樓莫吹笛大家留取倚闌干因笛中有  
落梅曲故云後漢藏豹獻果下馬高三尺乘之可於果  
樹下行王注西蜀有桐花鳥似鳳而小人謂之倒挂子  
先生梅詞所謂倒挂綠毛么鳳是也先生李氏山房記  
公釋少時讀書於廬山五老峰下白石菴之僧舍藏書  
凡九千餘卷莊子天地篇漢陰丈人方將為圃畦鑿隧  
而入井抱甕而出灌澆  
澆然用力多而見功寡

送淵師歸徑山

我昔嘗為徑山客至今詩筆餘山色師住此山三十年  
妙語應須得山骨谿城六月水雲蒸飛蚊猛捷如花鷹  
羨師方丈冰雪冷蘭膏不動長明燈山中故人知我至  
爭來問訊今何似為言百事不如人兩眼猶能書細字  
公自注徑山夏無蚊余舊詩云問  
龍乞水歸洗眼欲看細字銷殘年  
傳燈錄達摩欲返西竺命門人各言所得乃謂道育曰  
汝得吾骨最後慧可禮拜依位而立祖曰汝得吾髓

送表忠觀錢道士歸杭

并引

通教自杭來見余於吳興問觀亦卒工乎曰未也  
杭人比歲不登莫有助我者余曰異哉杭人重施  
輕財是不獨為福田今歲成矣其行乎及還作詩

送之

集中不載此引道士吳大錢之弟子也嘗見墨迹今錄公表忠觀碑載趙抃知杭州言故

吳越國王錢氏墳廟在錢塘臨安者皆蕪廢不治請以妙因院為觀使錢氏之孫為道士曰自然者居之以守其墳廟詔許之改妙因為表忠觀錢道士即碑中名自然者號通教大師

先王舊德在民心著令稱忠上意深墮淚行看會祠下  
挂名爭欲刻碑陰淒涼破屋塵凝坐憔悴雲孫雪滿簪

未信諸豪容郭解卻從他縣施千金

漢書吳芮傳徙為長沙王薨謚曰文王初文王芮高祖  
賢之制詔御史長沙王忠其定著令注漢約非劉氏不  
王而芮王故著令中使特王也或曰以芮至忠故著令  
也晉羊祜傳襄陽百姓於峴山祜平生游憩之所建碑  
立廟歲時饗祭焉望其碑者莫不流涕杜預因名為墮  
淚碑漢郭解傳洛陽人有相仇者邑中賢豪居間以十  
數終不聽客乃見解解夜見仇家仇家曲聽解解曰今  
子幸而聽我奈何從他縣奪人邑賢士大夫權乎迺夜  
去不使人知

次韻周開祖長官見寄

墨迹藏吳興向氏前題  
次韻奉和樂清開祖

長官見寄後題云元豐二年六月十三日吳  
興郡齋作旋見兒童迎細侯墨迹作已見當

是續改  
此一字

俯仰東西閱數州老於歧路豈伶優初聞父老推謝令  
旋一作已見兒童迎細侯政拙年年祈水旱民勞處處避

嘲謳河吞巨野那容塞盜入蒙山不易搜仕道固應慙

孔孟扶顛未可責求由漸謀田舍猶懷祿未脫風濤且

傍洲惘惘可憐真喪狗時時相觸是虛舟竭來震澤都

如夢只有苕溪可倚樓齋釀酸醅如蜜水樂工零落似

風甌

疑作鷗

遠思顏柳并諸謝近憶張陳與老劉

公自注謂張子

野陳令舉  
劉孝叔

風定軒牕飛豹腳  
雨餘欄檻上蝸牛  
舊游到

處皆蒼蘚同甲  
惟君尚黑頭  
憶昔湖山共尋勝  
相逢杯酒兩忘憂  
醉看梅雪清香過  
夜棹風船駭汗流  
百首共成山上集  
三人俱作月中游  
海南未起垂天翼  
澗底仍依徑寸床  
已許春風歸過我  
預憂詩筆老難酬  
此生歲月行飄忽  
晚節功名亦謬悠  
犀首正緣無事飲  
馮驩應為有魚留  
從今更踏青州麴  
薄酒知君笑督郵

晉書循吏傳鄧攸為吳郡守刑政清明後稱疾去職百姓數千人留牽攸船不得進攸乃小停夜中發去吳人

歌之曰統如打五鼓雞鳴天欲曙鄧侯侯挽不留謝令推  
不去又互見前注後漢郭伋字細侯為并州牧始至行  
部到西河美稷有兒童數百各騎竹馬道次拜迎漢溝  
洫志孝武元光中河決於瓠子東南注鉅野塞之輒復  
壞莊子庚桑楚汝亡人哉惘惘乎欲反汝情性而無由  
入可憐哉史記孔子獨立郭東門鄭人曰東門有人其  
顙似堯其項類皋陶其肩類子山木篇方舟而濟於河有  
三寸繫纍若喪家之狗莊子山木篇方舟而濟於河有  
虛船來觸舟雖有偏心之人不怒吳興詩序東晉王謝  
諸公莫不游而樂之而城中觀游之最則水堂見於柳  
惲若顏真卿之忠毅又不獨以篇詠著左太冲詠史詩  
鬱鬱澗底松離離山上苗以彼徑寸莖蔭此百尺條再  
見犀首注屢見史記孟嘗君傳馮驩居孟嘗傳舍彈其  
劍而歌曰長鋏歸來乎食無魚孟嘗君遷之幸舍食有  
魚矣青州督郵用世說桓溫主簿事詳見十五卷九日  
次韻王鞏詩注公烏臺詩話軾知湖州有周邠作詩寄



軾軾答云云自言遷徙數州未蒙朝廷擢用老於道路并所至遇水旱盜賊夫役數起民蒙其害以譏諷朝廷政事缺失并新法不便之所致也仕道云云以言已仕而道不行則非仕道也故有慙於孔孟孔子責由求云顛而不扶意以譏諷朝廷大臣不能扶正其顛仆也

林子中以詩寄文與可及余與可既沒追和其韻

斯人所甚厭投畀每不受欲其少須臾奪去惟恐後云誰尸此職無乃亦假守賦才有巨細無異斛與斗胡不安其分但聽物所誘時來各飛動意合無妍醜坐令雞

栖車長載朱伯厚平生無一旅既死咤萬口自聞與可  
亡胸臆生堆阜懸知臨絕意要我一執手相望五百里  
安得自其牖遺文付來哲後事待諸友伶俜嵇紹孤老  
病孟光偶世人賤目見爭笑千金帚君詩與楚詞識者  
當有取但知愛墨竹此歎吾已久故人多厚祿能復哀  
君否不見林與蘇饑寒自奔走

詩卷伯篇取彼諧人投畀有北有北不受漢賈山傳願  
少須臾毋死唐楊綰傳綰薨帝曰何奪綰之速耶漢項  
籍傳注假守兼守也後漢朱震字伯厚為州從事奏濟  
陰太守單匡臧罪帝收匡下廷尉諺曰車如雞栖馬如

狗疾惡如風朱伯厚左傳哀元有衆一旅杜預曰五百人為旅晉山濤傳與嵇康善康臨誅謂子紹曰巨源在汝不孤矣濤字巨源張平子東京賦若客所謂末學膚受貴耳而賤目者也魏文帝典論家有弊帚享之千金注已見劉勰辨騷楚詞者體慢於三代而風雅於戰國乃雅頌之博徒詩賦之英傑也

與王郎昆仲及兒子邁遠城觀荷花登峴山亭

晚入飛英寺分韻得月明星稀四首

吳興統記  
峴山在州

南五里本名顯山晉吳興太守段  
康於山上起顯亭後改曰峴山亭

昨夜雨鳴渠曉來風襲月蕭然欲秋意豁水清可吸環  
城三十里處處皆佳絕蒲蓮浩如海時見舟一葉此間

真避世青籜低白髮相逢欲相問已逐驚鷗沒

漢劉向傳榮惑襲月韓退之谿堂詩淺有蒲蓮  
深有蘆葦杜子美詩白鷗沒浩蕩萬里誰能馴

清風定何物可愛不可名所至如君子草木有嘉聲我  
行本無事孤舟任斜橫中流自偃仰適與風相迎舉杯  
屬浩渺樂此兩無情歸來兩溪間雲水夜自明

苕水如漢水鱗鱗鴨頭青吳興勝襄陽萬瓦浮青冥我  
非羊叔子愧此峴山亭悲傷意則同歲月如流星從我  
兩王子高鴻插脩翎湛輩何足道當以德自銘

李白襄陽歌遙看漢水鴨頭綠恰似蒲萄新潑醅再見  
晉書羊祜傳祜樂山水每風景必造峴山置酒言詠終  
日不倦嘗慨然歎息顧謂從事鄒湛云云湛曰公德冠  
四海道嗣前哲令聞令望必與此山俱傳至若湛輩乃  
當如公言耳祜字叔子又互見十一卷登  
常山絕頂詩註兩王子謂王適王適也

吏民憐我懶鬪訟日已稀能為無事飲可作不夜歸復  
尋飛英游盡此一寸暉撞鐘履聲集顛倒雲山衣我來  
無時節杖屨自推扉莫作使君看外似中已非

李德裕獻替記出  
不至遠歸不近夜

# 城南縣尉水亭得長字

兩尉鬱相望東西百步場揮旗蒲柳市伐鼓水雲鄉已  
作觀魚檻仍開射鴨堂全家依畫舫極目亂紅妝潏潏  
波頭細疎疎雨腳長我來閒濯足谿漲欲浮牀澤國山  
圍裏孤城水影傍欲知歸路處葦外記風檣

王注百步場尉司教閱處也揮旗伐鼓以言尉之事蒲  
柳市水雲鄉則言湖州也唐孟郊為溧陽尉開射鴨堂  
左傳隱五年春公將如棠觀魚杜子美詩幾時來翠節  
特地引紅妝又詩雨腳如麻未斷絕劉禹錫詩山圍故  
國周遭在李涉潤州  
詩孤城吹角水茫茫

與胡祠部游法華山

陂湖欲盡山為界始見寒泉落高派道人未放泉出山  
曲折虛堂瀉清快使君年老尚兒戲綠棹紅船舞澎湃  
一笑翻杯水濺席餘歡濯足波生隘長松攬天龍起立  
蒼藤倒谷雲崩壞仰穿蒙密得清曠一覽震澤吁可怪  
誰云四萬八千頃渺渺東盡日所矚歸塗十里盡風荷  
清唱一聲聞露漣公自注是日樂工有作此聲者嗟予少小慕真隱白  
髮青衫天所械忽逢佳士與名山河異枯楊便馬疥君  
猶鸞鶴偶飄墮六翮如雲豈長鍛不將新句紀茲游恐

# 負山中清淨債

漢司馬相如傳上林賦八川分流洶湧澎湃杼情詩李  
相蔚鎮淮南祖送孫處士舟子回篙濺水近坐妓濕衣  
孫為楊柳調曰從教水濺羅裙濕還道朝來行雨歸又  
見九卷蘇州閭丘江君詩注作李紳裴餘慶事姑竝存  
之魯靈光殿賦吁可畏乎其駭人也後漢周舉傳上已  
梁商燕於洛水酒闌唱罷繼以殢露之歌坐者皆為掩  
涕南史宋何尚之致仕於方山為退居賦以明所守後  
還攝職袁淑乃錄古來隱士有迹無名者為真隱傳以  
嗤焉揚子鷁明冲天不在六翮乎拔而傳尸  
鳩其累矣夫謝宣遠答靈運詩鍛翮周數仞

## 又次前韻贈賈耘老

具區吞滅三州界浩浩湯湯納千派從來不著萬斛船



一葦漁舟恣奔快仙壇古洞不可到空聽餘瀾鳴泮泮  
今朝偶上法華嶺縱觀始覺人寰隘山頭臥碣弔孤冢  
下有至人僵不壞空餘白棘網秋蟲無復青蓮出幽怪  
我來徙倚長松下欲搢茯苓親洗曬聞道山中富奇藥  
往往靈芝雜葵薤詩人空腹待黃精生事只看長柄械  
公自注子美詩云長鑱長鑱  
白木柄我生托子以為命今年大熟期一飽食葉微  
蟲真癬疥公自注今歲有小  
蟲食葉不甚為害白花半落紫穠香攘臂欲  
助磨鎌鍛安得山泉變春酒與子一洗尋常債

周禮東南曰揚州其山鎮曰會稽其澤藪曰具區蘇州  
圖經具區接蘇常湖秀四州界內有大小山七十二洞  
庭居其一焉十道記太湖廣三萬六千頃下有地道潛  
通已陵昔龍威丈人之所居法華經有人間是品能隨  
喜讚善者是人口中常出青蓮香按湖州法華山昔有  
樵夫入山得青蓮一枝蓋生於平陸因持入市市人以  
花生非時且異其事乃從樵夫還至本處掘地視之下  
有石匣中藏一童子舌根不壞花自舌出是人生持誦  
法華經致此勝果故以名其山事具寺碑牛僧孺有幽  
怪錄史記龜策傳下有伏靈上有兔絲所謂伏靈者在  
兔絲之下狀似飛鳥之形又伏靈者千歲松根也伏靈  
與茯苓同杜子美放歌行知子松根是茯苓連暮有意  
來同煮又詩酒債尋常行處有三國孫濟權之叔也嗜  
酒不治產常醉屢欠酒綺人皆笑之濟恬然自若謂人  
曰尋常行坐處欠人酒  
債欲貸此緼袍償之

趙閱道高齋

冷齋夜話趙閱道休官歸老三衢作高齋居之與鐘山佛慧禪師為

方外  
交

見公奔走謂公勞聞公隱退云公高公心底處有高下  
夢幻去來隨所遭不知高齋竟何義此名之設緣吾曹  
公年四十已得道俗緣未盡餘伊舉功名富貴俱逆旅  
黃金知繫何人袍超然已了一大事挂冠而去真秋毫  
坐看猿猱落置罔兩手未肯置所操乃知賢達與愚陋  
豈直相去九牛毛長松百尺不自覺企而羨者蓬與蒿

我欲贏糧往問道未應舉臂詞

一作

盧敖

法華經諸佛出世唯以一大事因緣故出現於世晉華  
譚傳或問譚曰諺言人之相去如九牛一毛寧有是乎譚  
曰即許由巢父讓天子之貴市道小人爭半錢之利此  
之相去何啻九牛一毛也漢司馬遷傳若九牛亡一毛韓  
退之詩自慙青蒿倚長松莊子庾桑楚南榮趺贏糧七  
日七夜至老子之所淮南子盧敖游乎北海遇一若士  
教自謂觀乎六合之外若士舉臂而竦身遂  
入雲中敖歎曰猶黃鵠之與壤蟲不亦悲哉

送俞節推

公曰注尚之子尚字退翁按俞節推名溫父湖州烏城人父汝尚字退翁

第進士僉書劍南西川判官趙清獻公守蜀  
入輒相對清談竟暮王介甫當國患一時故  
老不同已或言退翁清望可置之御史即召  
詣京師既知所以薦用意力辭得免還家苦

貧又從清獻於青州遂以屯田郎中致仕子  
由寄其詩首云不作清時言事官歸逾年忽  
告其妻黃曰人生七十者稀吾與夫人皆以  
過之可往矣黃曰我先去退翁曰善後三日  
黃沐浴化去退翁明日召諸子告曰吾亦行  
矣俄隱几而終孫莘老以為事類龐公表其  
墓而秦少游為書之

吳興有君子淡如朱絲琴一唱三太息至今有遺音嗟

余與夫子相避如辰參

公自注退翁官於蜀余在京師  
余歸而退翁去及余官於吳興

則退翁  
亡矣

猶喜見諸郎窈然清且深異時多良士末路喪

初心我生不有命其肯枉尺尋

揚子吾不睹參辰之相比也孟東野出門  
行參辰出沒不相待我欲橫天無羽翰

次韻答孫侔

孫侔字少述湖州人

十年身不到朝廷欲伴騷人賦落英但得低頭拜東野  
不辭中路伺淵明艤舟苔雪人安在卜築江淮計已成  
千里論交一言足與君蓋亦不須傾

韓退之醉留東野詩低頭拜東野願得始終如駟螭晉  
陶潛傳刺史王弘造之潛稱疾不見弘令人候之密知  
當往廬山乃齎酒先於半道要之潛既遇酒便引酌野  
亭欣然忘進弘乃出與相見遂歡宴窮日後漢范式傳  
與張劭為友二人並告歸鄉里式謂劭曰後二年當過  
拜尊親見孺子劭尅期候之母曰二年之別千里結言

何相見之審耶對曰式信  
士必不乖違至其日果至

重寄

陸務觀云孫少述一字正之與荆公交最厚故荆公別少述詩云應須一曲千回首西去論心有幾人又云子今去此來何時後有不可誰予規其相予如此及荆公當國數年不復相間人謂二公之交遂睽故公詩云云劉貢父亦有詩曰不負興公遂初賦更傳中散絕

交書

凜然高節照時人不信微官解挽君  
蔣濟謂能來阮籍  
薛宣真欲吏朱雲好詩衝口誰能擇俗子  
疑人未遣聞  
乞取千篇看俊逸不將輕比鮑參軍

晉阮籍傳太尉蔣濟問其有雋才而辟之籍都亭奏記  
乞迴繆恩以光清舉初濟恐籍不至得記遣卒迎之而  
籍已去濟大怒於是鄉親共諭之乃就吏竟謝病歸朱  
雲相吏事詳十五卷次韻王鞏留別詩注杜子美贈李  
白詩清新庾開府俊逸鮑參軍

次韻和劉貢父登黃樓見寄并寄子由二首

清派連淮上黃樓冠海隅

一作隅

此詩尤偉麗夫子計魁

梧

公自注劉世為人短小

世俗輕瑚璉巾箱襲武夫坐令秉傳遽奔

走為儲須邈邈我已失登臨誰與俱貧貧倉氏粟身聽

治家撫會合難前定歸休試後圖腴田未可買

公自注本欲買



田於泗上近  
已不遂矣

窮鬼卻須呼二水何年到雙洪不受艫至

今清夜夢飛轡策天吳

公自注此詩寄劉

漢書張良傳贊曰聞張良之智勇以為其貌魁梧奇偉  
反若婦人女子武夫與珣玞通唐韻珣玞石似玉又傳  
遽驛也以車曰傳以馬曰遽韓退之送窮文結柳作車  
縛草為船載糗與糒三揖窮鬼而告之云云於是上手  
稱謝燒車與船延之上坐山海經  
天吳水神也八首十尾亦曰河伯

與子皆去國十年天一禹數奇逢惡歲計拙集枯梧好  
士餘劉表窮交憶灌夫不矜持漢節猶喜攬桓須清句

金絲合高樓雪月俱吟哦出新意指畫想前撫

公自注  
子由初

赴南京送之出東門登城上覽山川之勝  
云此地可作樓觀於是始有改築之意  
自寫千言賦

新裁六幅圖

公自注近以絹自寫子由黃樓賦為六幅圖甚妙

傳看一坐聳勸

著尺書呼莫使騷人怨東游不到吳

公自注此詩寄子由

莊子徐無鬼越之流人去國期年見似人者而喜矣漢  
書李廣傳從大將軍青擊匈奴大將軍陰受上指以為  
李廣數奇恐不得所欲毋令當單于國語中飲優施起  
舞謂李克妻曰主孟啗我我教茲暇豫事君乃歌曰暇  
豫之吾吾不如鳥為人皆集於薨已獨集於枯後漢劉  
表為荊州刺史愛民養士學士歸者千數漢灌夫傳士  
在己左愈貧賤尤益禮敬與鈞耦人廣衆薦寵下輩士  
亦以此多之漢汲黯傳以便宜持節發河內粟以賑貧  
民蘇武傳在匈奴中仗漢節牧羊晉桓伊傳謝安將其  
頌曰使君於此不凡詳見三卷陪歐陽讌西湖詩註

陳州與文郎逸民飲別攜手河堤上作此詩

白酒無聲滑瀉油醉行堤上散吾愁春風料峭羊角轉  
河水渺綿瓜蔓流君已思歸夢已峽我能未到說黃州  
此生聚散何窮已未忍悲歌學楚囚

水衡記二月三月桃花水五月瓜蔓水謂瓜蔓延故以名左傳成九年晉侯觀於軍府見鍾儀問之曰南冠而縶者誰也有司對曰鄭人所獻楚囚也使稅之晉王尊傳過江人士每暇日相邀出新亭飲宴周顗中坐歎曰風景不殊舉目有山河之異皆相視流涕導惻然變色曰當共勦力王室克復神州何至作楚囚對泣耶

子由自南都來陳三日而別

夫子自逐客尚能哀楚囚奔馳二百里徑來寬我憂相逢知有得道眼清不流別來未一年落盡驕氣浮嗟我晚聞道款啟如孫休至言難久服放心不自收悟彼善知識妙藥應所投納之憂患場磨以百日愁冥頑雖難化鑄發亦已周平時種種心次第去莫留但餘無所還永與夫子游此別何足道大江東西州畏蛇不下榻睡足吾無求便為齊安民何必歸故丘

史記老子傳謂孔子曰去子之驕氣與多欲態色與淫志是皆無益於子之身莊子達生篇孫休款啟寡聞之

民也注款孔也啟開也言所見之小維摩經佛為大醫  
王應病與藥令得服行左傳昭三年盧蒲葵曰余髮如  
此種種余奚能為金剛經衆生若干種心如來悉知楞  
嚴經佛告阿難今當示汝無所還地韓退之贈張功曹  
詩下牀畏蛇食畏藥壯牧詩平生睡足  
處雲夢澤南州再見圖經黃州齊安郡

正月十八日蔡州道上遇雪次子由韻二首

蘭菊有生意微陽回寸根方憂集暮雪復喜迎朝暾憶  
我故居室浮光動南軒松竹半傾瀉未數葵與萱三徑  
瑤草合一餅井花溫至今行吟處尚餘履舄痕一朝出  
從仕永媿李仲元晚歲益可羞犯雪方南奔山城買廢

圃槁葉手自掀長使齊安人指說故侯園

揚子或問子蜀人也請人曰有李仲元者不屈其意不累其身不夷不惠可否之間也仲元世之師也漢蕭何傳召平者故秦東陵侯種瓜長安城東瓜美故世謂東陵瓜

鉛膏染髭須旋露霜雪根不如閉目坐丹府夜自瞰誰知憂患中方寸寓羲軒大雪從壓屋我非兒女萱平生學踵息坐覺兩鞮溫下馬作雪詩滿地鞭筆痕佇立望原野悲歌為黎元道逢射獵子遙指狐兔奔蹤迹尚可原窟穴何足掀寄謝李丞相吾將反丘園

南史何長瑜作韻語云陸展染白髮欲以媚側室青青  
不解久星星行復出孟東野百憂詩萱草兒女花不解  
壯士憂莊子大宗師真人之息以踵衆人之息以喉王  
注李丞相指李斯蓋用牽黃犬出上蔡東門語也註已  
見

過新息留示鄉人任師中

公自注任時知瀘州亦坐事對獄

昔年嘗羨任夫子卜居新息臨淮水怪君便爾忘故鄉  
稻熟魚肥信清美竹陂鴈起天為黑

公自注小竹陂在縣北

桐柏

煙橫山半紫

公自注桐柏廟在縣南

知君坐受兒女困悔不先歸

弄清泚塵埃我亦失收身此行蹭蹬尤可鄙寄食方將

依白足附書未免煩黃耳往雖不及來有年詔恩儻許

歸田里卻下關山入蔡州為買烏犍三百尾

公自注黃州出水牛

卜居楚詞篇名九域志蔡州新息縣史記韓信傳呂后使武士縛信信曰吾悔不用蒯通之計乃為兒女子所詐歐陽公詩何日早收身江河一漁艇杜子美贈李四丈詩蒼茫風塵際蹭蹬騏驎老白足黃耳竝已見說文也犍騊

過淮

朝離新息縣初亂一水碧暮宿淮南村已渡千山赤磨  
鼉號古戍霧雨暗破驛回頭梁楚郊永與中原隔黃州



在何許想像雲夢澤吾生如寄耳初不擇所適但有魚  
與稻生理已自畢獨喜小兒子少小自安佚相從艱難  
中肝肺如鐵石便應與晤語何止寄衰疾

公自注時家在子由處獨

與兒子

邁南來

水經注淮水出南陽平氏縣胎簪山東北過桐柏山又  
東過新息縣南尚書亂於河雲夢注屢見魏武故事長  
史王必忠能勤  
事心如鐵石

施註蘇詩卷十七

欽定四庫全書薈要卷一萬四千九百六十九

集部

施註蘇詩卷十八

宋 蘇軾 撰

宋 施元之 註

武進邵長蘅刪補

詩五十三首

起元豐三年庚申以後在黃州作

書磨公詩後

并引 磨音奴昆反香也 晉書有太史令郭磨

過加祿鎮南二十五里大許店休馬於逆旅祁宗祥家見壁上有幅紙題詩云滿院秋光濃欲滴老



僧倚杖清松側只怪高聲問不應瞋余踏破蒼苔  
色其後題云湓水僧寶磨宗祥謂余此光黃閒狂  
僧也年百三十死於熙寧十年既死人有見之者  
宗祥言其異事甚多作是詩以識之磨公本名清  
戒俗謂之戒和尚云

磨公昔未化來往淮山曲壽逾兩甲子氣壓諸尊宿但  
嗟濁惡世不受龍象蹴我來不及見悵望空遺躅霜顱  
隱白毫鎖骨埋青玉皆云似達摩隻履還西竺壁間餘

清詩字勢頗拔俗為吟五字偈一洗凡眼肉

內典五濁惡世維摩經龍象蹴蹋非驢所堪楞嚴經白  
毫宛轉五須彌鄴侯家傳李泌每導引骨節珊珊有聲  
人謂之鑠子骨晉庾亮傳將葬何充歎曰埋玉樹著土  
中使人情何能已傳燈錄達磨逝三歲魏宋雲奉使西  
域過之於松嶺手攜隻履翩翩獨逝雲復命具奏其事  
帝令啟墳惟空棺一隻革履存焉金剛經如來有肉眼  
不

游淨居寺  
并引

淨居寺在光山縣南四十里大蘇山之南小蘇山  
之北寺僧居仁為余言齊天保中僧惠思過此見

父老問其姓曰蘇氏又得二山名乃歎曰吾師告  
我遇三蘇則住遂留結菴而父老竟無有蓋山神  
也其後僧智顗見思於此山而得法焉則世所謂  
思大和尚智者大師是也唐神龍中道岸禪師始  
建寺於其地廣明庚子之亂寺廢於兵火至乾興  
中乃復而賜名曰梵天云

十載游名山自製山中衣願言畢婚嫁攜手老翠微不  
悟俗緣在失身蹈危機刑名非夙學陷穽損積威遂恐

生死隔永與雲山違今日復何日芒屨自輕飛稽首兩  
足尊舉頭雙涕揮靈山會未散八部猶光輝願從二聖  
往一洗千劫非裴回竹溪月空翠搖煙霏鐘聲自送客  
出谷猶依依回首吾家山歲晚將焉歸

畢婚嫁後漢向長事已見九卷次韻沈長官詩注史記  
申不害之學本於黃老而主刑名又韓非喜刑名法術  
之學尚書敘乃穿孔氏云穿穿地陷獸漢司馬遷傳猛  
虎處深山百獸震恐及在穿檻之中搖尾而求食積威  
約之漸也法華經稽首兩足尊行集經如來世尊福足  
慧足稱兩足尊法華經鈔世尊於靈山會上為諸大眾  
說二十八品放著問白毫相光照三千大千世界又天  
龍八部咸悉歡喜

梅花二首

春來幽谷水潺潺的皜梅花草棘間一夜東風吹石裂  
半隨飛雪渡關山

漢司馬相如傳宜笑的皜郭璞曰的皜鮮白貌也高適  
聽吹笛詩借問梅花何處落風吹一夜滿關山歐陽公  
山齋絕句正當年少惜花時日日東風吹  
石裂齊安拾遺關山岐亭路有春風嶺

何人把酒慰深幽開自無聊落更愁幸有清谿三百曲  
不辭相送到黃州

戲作種松



我昔少年日種松滿東岡初移一寸根瑣細如插秧二  
年黃茅下一一攢麥芒三年出蓬艾滿山散牛羊不見  
十餘年想作龍蛇長夜風波浪破碎朝露珠璣香我欲食  
其膏已伐百本桑

公自注煮松脂  
法用桑柴灰水

人事多乖迂神藥竟

渺茫竭來齊安野夾路須髯蒼會開龜蛇窟不惜斤斧  
瘡縱未得伏苓且當拾流肪釜盎百出入皎然散飛霜  
槁死三彭仇漂換五穀腸青骨凝綠髓丹田發幽光白  
髮何足道要使雙瞳方卻後五百年騎鶴還故鄉

杜子美寄楊員外詩翻動神仙窟封題鳥獸形宣室志  
僧契虛遇人尊游稚川仙府真人問曰汝能絕三彭之  
仇乎三彭道書所謂彭質彭矯彭居也在人身中狀如  
小兒有須毛人既死便作鬼耳黃庭經端於葉宮十九  
年三疊琴心化胎仙注三疊琴心三丹田也又三丹  
田各方一寸曰寸田神仙傳李根兩目瞳子皆方

萬松亭

并引

麻城縣令張毅植萬松於道周以庇行者且以名  
其亭去未十年而松之存者十不及三四傷來者  
之不嗣其意也故作是詩

十年栽種百年規好德無人助我儀

公自注古語云一  
年之計樹之以穀

十年之計樹之以木  
百年之計樹之以德

縣令若同倉庾氏亭松應長子孫

枝天公不救斧斤厄野火解憐冰雪姿為問幾株能合  
抱殷勤記取角弓詩

詩大雅我儀圖之愛莫助之史記平準書為吏者長子  
孫居官者以為姓號如淳曰倉氏庾氏是也角弓用左  
傳季氏有嘉樹事詳見十六卷臺頭寺送宋希元  
注杜子美懷李白詩更尋嘉樹傳不忘角弓詩

張先生 并序

先生不知其名黃州故縣人本姓盧為張氏所養  
陽狂垢污寒暑不能侵常獨行市中夜或不知其

所止往來者欲見之多不能致余試使人召之欣然而來既至立而不言與之言不應使之坐不可但俯仰熟視傳舍堂中久之而去夫孰非傳舍者是中竟何有乎然余以有思惟心追躡其意蓋未得也

熟視空堂竟不言故應知我未天全肯來傳舍人皆悅能致先生予亦賢脫屣不妨眠糞屋流澌爭看浴冰川士廉豈識桃推妙妄意稱量未必然

莊子達生篇壹其性養其氣合其德以通乎物之所造  
若是者其天守全其神無卻揚子叔孫通制君臣之儀  
徵先生於齊魯所不能致者二人王注本朝新信者得  
道之異人也常汚垢佯狂晝脫屣而行夜眠糞屋中人  
莫測之又楊文公說苑曰郭忠恕大寒鑿冰而浴唐朱  
桃椎傳高士廉為益州長史備禮以請與之語不答澄  
視而出士廉再拜曰祭酒其使我以無  
事治蜀耶乃簡條目薄賦斂州大治

### 陳季常所蓄朱陳村嫁娶圖

朱陳村在徐州豐  
縣白樂天詩徐州

古豐縣有村曰朱陳去縣百餘里桑麻青氎  
機梭聲軋軋牛驢走紛紛女汲澗中水男採山  
上新縣遠官事少山深人俗淳有財不行商有  
丁不入軍家家守村業頭白不出門田中老與  
幼相見何欣欣一村惟兩姓世世為婚姻親疎  
居有族少長游有羣黃雞與白酒歡會不隔旬

生者不遠別嫁娶先近隣死者不遠葬墳墓多  
遠村既安生與死不苦形與神所以多壽考往

往見

玄孫

何年顧陸丹青手畫作朱陳嫁娶圖聞道一村惟兩姓  
不將門戶買崔盧

歷代名畫記張懷瓘云像人之美顧得其神陸得其骨  
顧愷之陸探微也西川名畫錄趙德玄雍京人工畫車  
馬人物屋木山水天復中入蜀有朱陳村及豐沛盤車  
等圖至今相傳文中子任薛王劉崔盧之昏非古也何  
以視譜唐高士廉傳太宗以山東士人多尚閥閱嫁娶  
必多取貴故人謂之賣昏由是詔士廉等撰氏族志太  
宗曰我於崔盧李鄭無嫌今謀士勞臣何容納貨舊門  
向聲背實買昏為榮耶太上有立德其次立功其次立

言其次有爵為卿大夫世世不  
絕謂之門戶反是豈不惑耶

我是朱陳舊使君勸耕曾入杏花村而今風物那堪畫  
縣吏催錢夜打門

韓退之董生行門外惟  
有吏日來徵租更索錢

少年時嘗過一村院見壁上有詩云夜涼疑有  
雨院靜似無僧不知何人詩也宿黃州禪智寺  
寺僧皆不在夜半雨作偶記此詩故作一絕

佛燈漸暗饑鼠出山雨忽來修竹鳴知是何人舊詩句

已應知我此時情

韓退之次石頭驛詩默然都不語應識此時情

初到黃州

自笑平生為口忙老來事業轉荒唐  
長江遶郭知魚美好竹連山覺筍香  
逐客不妨員外置詩人例作水曹郎  
只慚無補絲毫事尚費官家壓酒囊

公自注檢校官例折支多得退酒袋

杜子美比隣詩愛酒晉山簡能詩何水曹  
白樂天聽吳水部新詩明朝與向詩家道  
水部如今不姓何說苑鮑白令之對秦始皇  
曰天下官則讓賢是也天下家則世繼是也  
故五帝以天下為官三王以天下為家漢蓋寬



饒傳韓氏易傳言五帝官天下三王家天下家以傳  
子官以傳賢白樂天詩况無治道術坐受官家祿

定惠院寓居月夜偶出

幽人無事不出門偶逐東風轉良夜參差玉宇飛木末  
繚繞香煙來月下江雲有態清自媚竹露無聲浩如瀉  
已驚弱柳萬絲垂尚有殘梅一枝亞清詩獨吟還自和  
白酒已盡誰能借不辭青春忽忽過但恐懽意年年謝  
自知醉耳愛松風會揀霜林結茅舍浮浮大甌長炊玉  
溜溜小槽如壓蔗飲中真味老更濃醉裏狂言醒可怕

閉門

一作但當

謝客對妻子倒冠落佩從嘲罵

後漢祭遵傳帝幸遵營饗士卒作黃門武樂良夜罷注云良猶深也南史陶宏景特愛松風庭院皆植松每聞其響欣然為樂杜牧之晚晴賦倒冠落佩兮與世闊疎

次韻前篇

去年花落在徐州對月酣歌美清夜

公自注去年花下對月與張師厚王

子立兄弟飲酒作蘋字韻詩

今年黃州見花發小院閉門風露下萬

事如花不可期餘年似酒那禁瀉憶昔扁舟泝巴峽落帆樊口高桅亞長江衮衮空自流白髮紛紛寧少借竟

無五畝繼沮溺空有千篇凌鮑謝至今歸計負雲山未  
免孤衾眠客舍少年辛苦真食蓼老境安間一作清閒如啖  
蔗饑寒未至且安居憂患已空猶夢怕穿花踏月飲村  
酒免使醉歸官長罵

陶淵明詩佳人美清夜達曙酣且歌韓退之詩大帆夜  
劃窮高桅白樂天詩何異食蓼蟲不知若是苦啖蔗用  
顧愷之事已見十六卷韓退之答張徹詩初味如啖蔗  
遂通斯建旣杜子美鄭廣文詩醉即騎馬歸頗遭官長  
罵再見

## 安國寺浴

老來百事懶身垢猶念浴衰髮不到耳尚煩月一沐山  
城足薪炭煙霧蒙湯谷塵垢能幾何翛然脫羈梏披衣  
坐小閣散髮臨修竹心困萬緣空身安一牀足豈惟忘  
淨穢兼以洗榮辱默歸毋多談此理觀要熟

安國寺尋春

卧聞百舌呼春風起尋花柳村村同城南古寺修竹合  
小房曲檻欹深紅看花歎老憶年少對酒思家愁老翁  
病眼不羞雲母亂鬢絲強理茶煙中遙知二月王城外

玉仙洪福花如海薄羅勻霧蓋新粧快馬爭風鳴雜珮  
玉川先生真可憐一生耽酒終無錢病過春風九十日  
獨抱添丁看花發

孟東野樂府送花人老盡人悲花自開春秋經昭公二  
十二年劉子單子以王猛入於王城呂希哲家塾記玉  
仙觀在京城宣化門外有陳道士者修葺亭臺栽種花  
木甚盛洪福寺在京師黃魯直有同元明過洪福寺戲  
題詩云洪福僧園拂紺紗舊題塵壁似昏鴉春殘已是  
風和雨更著遊人撼落花曹景宗傳騎快馬如龍與年  
少輩數十騎云云覺耳後生風鼻頭出火盧仝詩天下  
薄夫苦耽酒玉川先生也耽酒薄夫有錢恣張樂先生  
無錢養恬漠又示添丁子詩數日不  
食強人行何忍索我抱看滿樹花

寓居定惠院之東雜花滿山有海棠一株土人不知貴也

江城地瘴蕃草木只有名花苦幽獨嫣然一笑竹籬間  
桃李漫山總麤俗也知造物有深意故遣佳人在空谷  
自然富貴出天姿不待金盤薦華屋朱唇得酒暈生臉  
翠袖卷紗紅映肉林深霧暗曉光遲日暖風輕春睡足  
雨中有淚亦悽愴月下無人更清淑先生食飽無一事  
散步逍遙自捫腹不問人家與僧舍拄杖敲門看修竹

忽逢絕艷照衰朽，歎息無言揩病目。  
陋邦何處得此花，無乃好事移西蜀。  
寸根千里不易到，銜子飛來定鴻鵠。  
天涯流落俱可念，為飲一樽歌此曲。  
明朝酒醒還獨來，雪落紛紛那忍觸。

周易坤卦：天地變化，草木蕃。楚詞九歌：幽獨處乎山中。  
宋玉賦：嫣然一笑，惑陽城，迷下蔡。杜子美詩：絕代有佳人，幽居在空谷。  
又：天寒翠袖薄，日暮倚修竹。又：寄蘇侍御詩：紅顏白面花映肉，明皇雜錄：上皇嘗登沉香亭，召妃子時，卯酒未醒，高力士從侍兒扶掖而至，上皇笑曰：「豈是妃子醉耶？」海棠睡未足耳。世說：王子猷嘗行過吳中，見一士大夫家，極有好竹，王肩輿徑造竹下，諷嘯良久，南史：袁粲為丹陽尹，郡南一家有竹石，率爾步往，直

造竹所嘯詠自得韓退之詩誰家多竹  
門可款白樂天送春詩百花落如雪

次韻樂著作野步

老來幾不辨西東秋後霜林且強紅  
眼暈見花真是病  
耳虛聞蟻定非聰酒醒不覺春彊半  
睡起常驚日過中  
植杖偶逢為黍客披衣閒詠舞雩風  
仰看落葉收松粉  
俯見新芽摘杞叢  
楚雨還昏雲夢澤  
吳潮不到武昌宮  
公自注黃州對岸武昌縣有孫權故宮  
廢興古郡詩無數  
寂寞間牕易粗  
通解組歸來成二老  
風流他日與君同



圓覺經譬彼病目見空中花聞蟻晉殷仲堪父事注已見揚子是以過中則惕又聖人之道譬猶日之中矣不及則未過則昃三國志吳主孫權二十五年自公安都鄂改名武昌杜子美贈賈公詩與子成二老來往亦風流已見蘅按公用粗字可通上聲十卷寄劉孝叔詩問道已許談其粗與組覩叶此詩寂寞閑牕易粗通亦作上聲想必有據

二月二十六日雨中熟睡至晚強起出門還作此詩意思殊昏昏也

卯酒困三杯午餐便一肉雨聲來不斷睡味清且熟昏昏覺還卧展轉無由足彊起出門行孤夢猶可續泥深

竹雞語村暗鳩婦哭明朝看此詩睡語應難讀

白樂天詩空腹三杯卯後酒  
遜齋閑覽白蟻聞竹雞之  
聲盡化為水今山林多有之  
其聲自呼為泥滑滑者是  
也歐陽公鳴鳩詩天將陰鳴鳩  
逐婦鳴中林鳩婦怒曉無好音

雨晴後步至四望亭下魚池上遂自乾明寺前  
東岡上歸二首

雨過浮萍合蛙聲滿四隣  
海棠真一夢梅子欲嘗新  
拄杖間挑菜鞦韆不見人  
殷勤木芍藥獨自殷餘春

梁宗懷荆楚歲時記春節懸長繩於高木士女坐立其上共推引之以為戲名曰鞦韆  
淫樂經謂之習索天寶

遺事禁中呼木芍藥為牡丹論語奔而殿注在軍前曰  
啟後曰殿柳子厚芍藥詩歌紅醉濃露窈窕畱餘春

高亭廢已久下有種魚塘暮色千山入春風百草香市  
橋人寂寂古寺竹蒼蒼鸛鶴來何處號鳴滿夕陽

段公路北戶雜錄陶朱公養魚經云凡種魚池中有數  
洲令魚循環無窮如在江湖柳子厚記蒼然暮色自遠  
而至杜子美絕句遲日  
江山麗春風花草香

### 雨中看牡丹三首

霧雨不成點映空疑有無時於花上見的  
驟走明珠秀色洗紅粉暗香生雪膚黃昏更蕭瑟頭重欲相扶

杜子美詩鳴雨既過漸細微映空搖颺如絲飛淮南子  
日薄於虞淵是謂黃昏杜牧之詩醉頭扶不起三丈日  
高還

明日雨當止晨光在松枝清寒入花骨肅肅初自持午  
景發濃艷一笑當及時依然暮還斂亦自惜幽姿

幽姿不可惜後日東風起酒醒何所見金粉抱青子千  
花與百草共盡無妍鄙未忍汙泥沙牛酥煎落藥

洛陽貴尚錄孟蜀時兵部貳卿李昊每牡丹花開將數  
朵分遺親友以金鳳膠成歌詩以致之又以興平酥同  
贈且云俟花謝即以酥煎食之  
無棄穠花也其風流貴重如此

次韻樂著作送酒

少年多病怯杯觴老去方知此味長  
萬斛羈愁都似雪一壺春酒若為湯

庾信愁賦且將一寸心能容萬斛愁  
孔子家語人之棄惡如湯之濯雪  
馬枚叔七發小飯大歡如湯沃雪

次韻樂著作天慶觀醮

濁世紛紛肯下臨夢尋飛步五雲深  
無因上到通明殿只許微聞玉佩音

王欽若翊聖保德傳建隆初鳳翔蓋屋民張守真一日  
朝禮玉皇大殿觀其額曰通明殿不曉其旨真君曰上

帝在無上天為諸天之尊常升金殿  
光明通徹無所不照故為通明殿

王齊萬秀才寓居武昌縣劉郎洑正與伍洲相  
對伍子胥奔吳所從渡江也

君家稻田冠西蜀擣玉揚珠三萬斛塞江流  
梯起書樓碧瓦朱欄照山谷傾家取樂不論  
命散盡黃金如轉燭惟餘舊書一百車方舟  
載入荆江曲江上青山亦何有伍洲遙望  
劉郎數明朝寒食當過君請殺耕牛壓私酒  
與君飲酒細論文酒酣訪古江之濱仲謀公  
瑾不須弔

一醉波神英烈君

公自注杭州伍子胥廟封英烈王

晉王濬傳武帝謀伐吳濬造船於蜀木枹蔽江而下唐李磎傳聚書至萬卷時人號李書樓杜子美詩碧瓦朱甍照城郭李太白詩天生我才必有用黃金散盡還復來杜詩萬事如轉燭又三歲如轉燭曹子建樂府中厨辦豐膳烹羊宰肥牛李詩吳姬壓酒喚客嘗杜懷李白詩何時一樽酒重與細論文

杜沂游武昌以酴醾花菩薩泉見餉二首

酴醾不爭春寂寞開最晚青蛟走玉骨羽蓋蒙珠幘不粧艷已絕無風香自遠淒涼吳宮闕紅粉埋故苑至今微月夜笙簫來翠嚬餘妍入此花千載尚清婉怪君呼

不歸定為花所挽昨宵雷雨惡花盡君應返

王注以武昌有孫權故宮故特用吳宮嬪嬙之魂為意耳

君言西山頂自古流白泉上為千牛乳下有萬石鉛不  
媿惠山味但無陸子賢願君揚其名庶託文字傳寒泉  
比吉士清濁在其源不食我心惻於泉非所患嗟我本  
何有虛名空自纏不見子柳子餘愚汙谿山

牛乳用杜詩已見常州圖經惠山之側有錫山其山出錫古謠云有錫兵無錫寧故縣名無錫陸文學傳云陸羽品第天下水味以惠山泉為第二刻石留山中故名陸子泉有祠堂在焉周易井卦井渫不食為我心惻九



五井冽寒泉食象曰寒泉之食中正也柳子厚愚溪詩序山水之奇以余故咸以愚辱焉

陳季常自岐亭見訪郡中及舊州諸豪爭欲邀致之戲作陳孟公詩一首

孟公好飲寧論斗醉後關門防客走不妨間過左阿君  
百謫終為賢太守老居閭里自浮沈笑問伯松何苦心  
忽然載酒從陋巷為愛揚雄作酒箴長安富兒求一過  
千金壽君君笑唾汝家安得客孟公從來只識陳驚坐

漢書游俠傳陳遵字孟公嘗過長安富人左氏飲食作樂司直陳崇劾奏遵乘藩車過寡婦左阿君置酒歌謳

起舞跳梁頓仆坐上又初為京兆吏日出醉歸曹事數廢西曹以故事謫之曰陳卿今日以某事謫遵曰滿百乃相聞又與張竦伯松俱以列侯歸長安竦居貧無賓客時時好事者從之質疑問事而遵車騎滿門酒肉相屬先是揚雄作酒箴遵大喜之謂竦曰吾與爾猶是矣足下諷誦經書苦身自約而我放意自娛浮沈俗間官爵功名不減於子而差獨樂顧不優耶又遵所到衣冠懷之惟恐在後時列侯有與遵同姓字者每至人門曰陳孟公坐中莫不震動既至而非因號其人曰陳驚坐

### 游武昌寒谿西山寺

連山蟠武昌翠木蔚樊口我來已百日欲濟空搔首坐看鷗鳥沒夢逐麝麝走今朝橫江來一葦寄衰朽高談

破巨浪飛屨輕重去人曾幾何絕壁寒谿吼風泉兩  
部樂松竹三益友徐行欣有得芝朮在蓬莠西上九曲  
亭衆山皆培塿卻看江北路雲水渺何有離離見吳宮  
莽莽真楚藪空傳孫郎石無復陶公柳爾來風流人惟  
有漫浪叟買田吾已決乳水况宜酒所須修竹林深處  
安井臼相將踏勝絕更裏三日糗

楚辭招隱士白鹿齋麇兮或騰或倚揚雄反騷橫江湘  
以南淮兩部樂用孔珪兩部鼓吹語已見元次山丐論  
古人鄉無君子則興雲山為友里無君子則與松竹為  
友坐無君子則與琴酒為友論語益者三友左傳襄二

十四年子太叔曰部婁無松栢注部婁小阜也杜子美詩高山之外皆培婁離騷九章滔滔孟夏兮草木莽莽三國孫策傳袁術嘗嘆曰使術有子如孫郎死復何恨江表傳策雖有位號士皆呼為孫郎晉陶侃鎮武昌課諸營種柳唐元結傳家溪濱乃自稱浪士及有官人以為浪者亦漫為官乎呼為漫郎既客樊上少長相戲更曰聲叟又漫浪於人間得非聲斷乎公漫久矣可以漫為叟元結集自釋云及家樊上漫遂顯焉注云在武昌縣西五里貌乾飯屑也

武昌銅劍歌 并引

供奉官鄭文嘗官於武昌江岸裂出古銅劍文得之以遺余治鑄精巧非鍛冶所成者

雨餘江清風卷沙雷公躡雲捕黃蛇蛇行空中如枉矢  
電光煜煜燒蛇尾或投以塊鏗有聲雷飛上天蛇入水  
水上青山如削鐵神物欲出山自裂細看兩脅生碧花  
猶是西江老蛟血蘇子得之何所為蒯綏彈鋏詠新詩  
君不見凌烟功臣長九尺腰間玉具高挂頤

漢天文志枉矢狀類大流星蛇行而蒼黑望如有毛目  
然廣異記開元時太原武勝之嘗於靜江灘中見雷公  
踐雲逐蛇靜江夫以石投之中蛇鏗然有聲雷公飛去  
乃得一銅劍有文云許旌陽斬蛟第二劍李賀長平箭  
頭歌淒淒古血生銅花史記孟嘗君傳馮驩見孟嘗君  
置傳舍十日孟嘗君問傳舍長曰客何所為答曰馮先

生甚貧獨有一劍耳又蒯綬每彈劍而歌注蒯如茅之類可為繩綬謂把劍之處漢匈奴傳單于朝天子於甘泉宮賜以玉具劍後漢馮異傳光武賜以乘輿玉具劍戰國策大冠若箕修劍拄頤

定惠院顥師為余竹下開嘯軒

嘯鳩催天明喧喧相詆譙暗蛩泣夜永唧唧自相弔飲風蟬至潔長吟不改調食土蚓無腸亦自終夕叫鳶貪聲最鄙鵲喜意可料皆緣不平鳴慟哭等嬉笑阮生已麤率孫子亦未妙道人開此軒清坐默自照衝風振河海不能號無竅累盡吾何言風來竹自嘯

楚辭離騷恐鵲鳩之先鳴漢書譙讓注譙責也韓退之  
秋懷詩蟲吊寒夜永又吟蛩相唧唧傳玄蟬賦美茲蟬  
之純潔兮東陰陽之微靈吸澀露之朝零聆商風而和  
鳴差羣吟以遙倡似蕭管之餘音荀子蚓上食埃土下  
飲黃泉用心一也崔豹古今注蚓曰歌女莊子秋水篇  
鵲待腐鼠鵲鵲過之仰而視之曰嚇西京雜記陸賈曰  
蜘蛛集而百事喜乾鵲噪而行人至韓退之送孟東野  
序凡物不得其平則鳴戰國策長歌之哀過於慟哭嬉  
笑之怒甚於裂眦孫登嘯詳見八卷惠山謁  
錢道人詩註楚詞九歌衝風起兮水橫波

# 石芝

并引

元豐三年五月十一日癸酉夜夢游何人家開堂  
西門有小園古井井上皆蒼石石上生紫藤如龍

地枝葉如赤箭主人言此石芝也余率爾折食一枝衆皆驚笑其味如雞蘇而甘明日作此詩

空堂明月清且新幽人睡息來初勻了然非夢亦非覺  
有人夜呼祁孔賓披衣相從到何許朱攔碧井開瓊戶  
忽驚石上堆龍蛇玉芝紫筍生無數鏘然敲折青珊瑚  
味如蜜藕和雞蘇主人相顧一撫掌滿堂坐客皆盧胡  
亦知洞府嘲輕脫終勝嵇康羨王烈神山一合五百年  
風吹石髓堅如鐵



晉和嘉傳字孔賓少清貧好學年二十餘夜忽聽中有  
聲呼曰和孔賓隱去來修飭人間甚苦不可詰所得未  
毛銖所喪如山崖旦而逃去晉石崇傳武帝賜王愷珊  
瑚樹愷以示崇崇便以鐵如意擊之應手而碎杜子美  
詩腰下寶玦青珊瑚韓退之詩太華山頭玉井蓮開花  
十丈藕如船冷比雪霜甘比蜜一片入口沈疴痊本草  
水蘇一名雞蘇孔叢子盧胡而笑闕子宋之愚人得燕  
石藏之以為大寶周客見之掩口盧胡而笑續神仙傳  
許碯遊盧口間嘗醉吟曰閨苑花前是醉鄉沼翻王母  
几霞觴羣仙拍手嫌輕脫謫向人間作酒狂治似丹反  
王烈石髓詳五卷至秀州詩注按仙經神山  
五百年一開石髓出得而服之壽與天齊

今年正月十四日與子由別於陳州五月子由  
復至齊安以詩迎之

驚塵急雪滿貂裘淚灑東風別宛丘又向邯鄲枕中見  
卻來雲夢澤南州睽離動作三年計牽挽當為十日留  
早晚青山映黃髮相看萬事一時休

異聞集開元中道人呂翁常往來邯鄲有書生姓盧與  
翁同止逆旅主人方蒸黃粱共待其熟盧生不覺長嘆  
翁問之具言生世困厄翁開囊中枕以授盧曰枕此當  
如願生俛首但記身入枕中遂至其家未幾登高第歷  
臺閣出入將相五十年忽欠伸而寤黃粱猶未熟也謝  
曰先生以室吾欲耳自此不復求仕矣漢陸賈傳約過  
女極飲十日而更柳子厚別劉夢得詩  
耦耕若便遺身世黃髮相看萬事休

遷居臨臯亭

我生天地間一蟻寄大磨區區欲右行不捄風輪左雖

云走仁義未免違

一作遲

寒餓劍米有危炊鍼羶無穩坐

豈無佳山水借眼風雨過歸田不待老勇決凡幾個幸

茲廢棄餘疲馬解鞍馱全家占江驛絕境天為破饑貧

相乘除未見可弔賀澹然無憂樂苦語不成些

蘇个切

抱朴子天圓如張蓋地方如棋局天旁轉如磨推而左  
行日月右行隨天左轉譬之蟻行磨石之上磨左旋而  
蟻右去磨疾而蟻遲故不得不隨磨而左迴焉晉天文  
志亦云撈罷經覺明空昧相待成搖故有風輪執持世  
界晉顧愷之傳桓玄與愷之同在殷仲堪坐共作危語  
玄曰矛頭淅米劍頭炊晉杜錫傳屢諫愷懷太子太子

患之置針著錫常所坐氊中刺之流血張平子有歸田賦左傳昭八年史趙曰可弔也而又賀之史記張儀傳羣臣皆賀子獨弔何也些說文語詞也宋玉哀屈原作招魂楚些沈存中云今夔峽湖湘及南北江獠人凡禁呪勾尾皆稱些乃楚人舊俗西域呪語未皆云娑婆訶亦三合而為些也

### 曉至巴口迎子由

去年御史府舉動觸四壁幽幽百尺井仰天無一席隔牆聞歌呼自恨計之失畱詩不忍寫苦淚漬紙筆餘生復何幸樂事有今日江流鏡面淨煙雨輕羃羃孤舟如鳬鷺點破千頃碧聞君在磁湖欲見隔咫尺朝來好風

色旗尾西北擲行當中流見笑眼清光溢此邦疑可老  
修竹帶泉石欲買柯氏林茲謀待君必

漢王莽傳定安公第置門衛使者監領敕阿乳母不得  
與語常在四壁中韓退之詩隔牆聞譁呼衆口極鵠鴈  
按先生有獄中寄子由詩見四十卷中杜子美復  
愁詩阜尾掣旗竿劉禹錫詩旗尾飄揚勢漸高

### 與子由同游寒谿西山

散人出入無町畦朝游湖北暮淮西高安酒官雖未上  
兩腳垂欲穿塵泥與君聚散若雲雨共惜此日相提攜  
千搖萬元到樊口一箭放溜先鳬鷺層層草木暗西嶺

我今漂泊等鴻鴈江南江北無常栖幅巾不擬過城市

欲踏徑路開新蹊

公自注路有直入寒谿不過武昌者

卻憂別後不忍到

見子行迹空餘悽吾儕流落豈天意自坐迂闊非人擠  
行逢山水輒羞歎此去未免勤鹽齏何當一遇李八百

公自注李八百宅在筠州

相哀白髮分刀圭

唐陸龜蒙號江湖散人莊子人間世而幾死之散人又  
惡知散木又彼且為無町畦亦與之為無町畦寒谿西  
山在鄂州武昌縣屬湖北黃州屬淮西圖經筠州高安  
郡潁潁遺老傳子瞻以詩得罪朝廷輟從坐謫監筠州

鹽酒稅神仙傳李八百蜀人也莫知其名歷世見之時  
人計其年八百歲因以號之或隱山林或出市廛相傳  
能拄拐日八百里陳搏傳有一人青巾短褐叩陳希夷  
門求報條去追之見老人衣鹿皮曰此神仙李八百也  
動則八百里本草凡散藥有云刀圭者十分方寸匕之  
一堆如梧桐子大也韓退之寄周隨州詩金丹別後知  
傳符乞取刀圭

次韻答子由

平生弱羽寄衝風此去歸飛識所從  
好語似珠穿一一  
妄心如膜退重重  
山僧有味寧知子  
瀧吏無言只笑儂  
尚有讀書清淨業  
未容春睡敵千鍾

杜牧之登第後過隣居老僧詩山僧尚未知名姓始羨  
空門氣味長韓退之灋吏詩灋吏垂手笑官何問之愚  
儂幸無負犯何由到而知華嚴經即以利益諸衆生而為自行清淨業

### 和何長官六言五首

作邑君真伯厚去官我豈曼容一廬願託仁政六字難

### 賡變風

後漢朱震字伯厚詳十七卷林子中以詩寄文注漢兩  
龔傳邴曼容養志自修為官不肯過六百石輒自免去

五噫已出東洛三復願比南容學道未逢潘盎

公自注  
南海謂

狂為盎潘近  
世得道者也  
草書猶似楊風



後漢梁鴻傳過京師作五噫之歌已見王注元祐中廣南僊智高反至梧州有潘盎者棄妻子服儒衣常持一大翼行坐獨語南越謂愚盎僂賊聞其異名而問之曰吾形貌如何盎曰汝一賊也他無所類賊怒害之法書苑楊凝式善行草書時人以楊風呼之再見

石渠何須反顧水驛幸足相容長江大欲見庀探支八月涼風

三輔舊事石渠閣在未央大殿北以藏祕書漢劉向傳講論五經於石渠楚辭離騷忽反顧以游目今將往觀乎四荒王注探支字是官物官錢有此名此亦戲言之矣

清風初號地籟明月自寫天容貧家何以娛客但知抹

# 月批風

韓退之詩天容與水色此處皆綠淨  
禪宗有薄批明月細抹清風之語

青山自是絕色無人誰與為容說向市朝公子何殊馬  
耳東風

李太白詩世人間此皆  
掉頭有如東風射馬耳

## 觀張師正所蓄辰砂

將軍結髮戰蠻溪篋有殊珍勝象犀漫說玉牀收

一作分

箭鏃何曾金鼎識刀圭近聞猛士收丹穴欲助君王鑄

裹蹠多少空巖人不見自隨初日吐虹蜺

圖經辰州出丹砂其苗乃白石耳土人謂之砂牀箭簇連牀者色若鐵而瑩澈漢貨殖傳寡婦清其先得丹穴擅其利數世武帝紀太始二年詔更黃金為麟趾裹蹠史記封禪書少君言上曰祀竈則致物致物而丹沙可化為黃金沙同砂大洞鍊真寶經上品光明沙者受太陽洞通澄明正真之精氣降結紅光耀如日色

五禽言五首并引

梅聖俞嘗作四禽言余謫黃州寓居定惠院遠舍皆茂林修竹荒池蒲葦春夏之交鳴鳥百族土人多以其聲之似者名之遂用聖俞體作五禽言

按梅聖俞詩集四禽言則竹雞婆餅焦提胡蘆杜鵑也一曰泥滑滑苦竹岡雨蕭蕭馬上郎馬蹏凌競雨又急此鳥為君應斷腸二曰婆餅焦兒不食爾父向何之爾母山頭化為石山頭化石可奈何遂作微禽噉不息三曰提胡蘆沽美酒風為賓樹為友山花撩亂目前開勸爾今朝千萬壽四曰不如歸去春山雲暮萬木兮參天蜀天兮何處人言有翼可歸飛安用悲噉向高樹

使君向蘄州更唱蘄州鬼我不識使君寧知使君死人  
生作鬼會不免使君已老知何晚

公自注王元之自黃移蘄州聞噉鳥問其

名或對曰此名蘄州鬼  
元之惡之果卒於蘄

南山昨夜雨西谿不可渡谿邊布穀兒勸我脫破袴不

辭脫袴谿水寒水中照見催租癯

公自注土人謂布穀為脫卻破袴

去年麥不熟挾彈規我肉今年麥上場處處有殘粟豐

年無象何處尋聽取林間快活吟

公自注此鳥聲云麥飯熟即快活

力作力作蠶絲一百箔壠上麥頭昂林間桑子落願儂

一箔千兩絲繅絲得蛹飼爾雛

公自注此鳥聲云蠶絲一百箔

王元景談數元景嘗大醉楊遵彥謂之曰何大低昂元景曰黍熟頭低麥熟頭昂黍麥俱有所以低昂

姑惡姑惡姑不惡妾命薄君不見東海孝婦死作三年

乾不如廣漠龐姑去卻還

公自注姑惡水鳥也俗云婦以姑虐死故其聲云

漢于定國傳東海有孝婦其姑自經死姑女告吏婦殺我母具獄上府于公以此婦養姑以孝聞必不殺也太守不聽竟論殺孝婦郡中枯旱三年後漢列女傳廣漢姜詩妻同郡龐盛之女詩母愛飲江水妻汲不時至母渴詩責而遣之妻乃寄止隣舍晝夜紡績市珍羞使鄰母以意自遺其姑久之姑怪問隣母感慚呼還

次韻子由病酒肺疾發

憶子少年時肺病疲坐卧喊呀或終日勢若風雨過虛陽作浮漲客冷仍下墮妻孥愁悵望膾炙不登坐終年禁晚食半夜發清餓胃強鬲苦滿肺斂腹輒破三彭恣啖嚙二豎肯逋播寸田可治生誰勸耕黃稷

公自注新法方田謂

黃稭為上腴

探懷得真藥不待君臣佐初如雪花積漸作櫻

桃

一作珠

大隔牆聞三燕隱隱如轉磨自茲失故疾陽唱

陰輒和神仙多歷試中路或坎坷平生不盡器痛飲知  
無奈舊人眼看盡老伴餘幾個殘年一斗粟待子同春  
簸云何不自珍醉病又一挫真源結梨棗世味等糠莖  
耕耘當待獲願子勤自課相將賦遠游仙語不用些

三彭注見本卷左傳成十年晉景公求醫於秦秦桓公  
使醫緩為之未至公夢疾為二豎子曰彼良醫也懼傷  
我焉逃之其一曰居於育之上膏之下若我何黃庭經  
寸田尺宅可治生寸田謂三丹田注見本卷本草養命

之藥則多君養性之藥則多臣療病之藥則多佐漢淮南厲王傳廢處蜀嚴道邛邛不食而死民歌之曰一尺布尚可縫一斗粟尚可舂兄弟二人不相容真詰紫微王夫人授許長史曰火棗交梨之樹已生君心中猶令有荆棘相雜可剪荆棘出此樹單生糠莖漢陳平傳亦食糠覈耳史記范睢傳置莖豆其前令兩黥徒夾而馬食之楚辭遠游悲時俗之迫阨兮願輕車以遠游

正月廿日往岐亭郡人潘古郭三人送余於女

王城東禪莊院

志林黃州東十五里有永安城俗謂之女王城

十日春寒不出門不知江柳已搖村稍聞泱泱流冰谷盡放青青沒燒痕數畝荒園留我住半瓶濁酒待君溫



去年今日關山路細雨梅花正斷魂

唐詩岡分河勢  
斷春入燒痕深

鐵拄杖 并引

柳真齡字安期閩人也家寶一鐵拄杖如柳栗木  
牙節宛轉天成中空有簧行輒微響柳云得之浙  
中相傳王審知以遺錢鏐鏐以賜一僧柳偶得之  
以遺余作此詩謝之

柳公手中黑蛇滑千年老根生乳節忽聞鏗然爪甲聲

四坐驚顧知是鐵含簧腹中細泉語迸火石上飛星裂  
公言此物老有神自昔閩王餉吳越不知流落幾人手  
坐看變滅如春雪忽然贈我意安在兩腳未許甘衰歇  
便尋轍迹訪崆峒徑渡洞庭探禹穴披榛覓藥採芝菌  
刺虎鏃蛟搗蛇蝎會教化作兩錢錐歸來見公未華髮  
問我鐵君無恙否取出摩挲向公說

杜子美挑竹杖引出入瓜甲鏗有聲莊子在宥黃帝立  
為天子十九年令行天下聞廣成子在於空同之上故  
往見之韻語陽秋崆峒山汝州岷俱有之杜詩云崆峒  
小麥熟則岷州之崆峒也黃帝往空同乃汝州之空同

也漢司馬遷傳南游江淮上會稽探禹穴漢書縱殺吳  
王周禮以時擲魚鼈龜蜃說苑干將莫邪斬羽截鐵刺  
鐘不錚此至利也使之補履曾不如雨錢之雖東方朔  
別傳亦云桂苑叢談李德裕贈僧方竹杖及再見問杖  
無恙否曰已規而漆之矣公嗟惋久之風俗通恙毒  
蟲也喜傷人古人草居露宿故相勞問必曰無恙


### 與潘三失解後飲酒

千金弊帚人誰買半額蛾眉世所妍顧我自為都  
眊眊  
憐君欲鬪小嬋娟青雲豈易量他日黃菊猶應似去年  
醉裏未知誰得喪滿江風月不論錢

後漢馬廖傳城中好廣蓄四方且半額國火補進士不  
提而飲謂之打眊眊孟東野嬋娟篇花嬋娟泛春泉妓

嬋娟不長妍李太白詩  
清風明月不用一錢買

施註蘇詩卷十八



總校官庶吉士臣張能照

校對官編修臣楊壽楠

膳錄監生臣吳鑄

膳錄監生臣王錡